

litani voluntate facta fuisset, nulla declaratur his verbis: [Itaque ordinatio-
nem, quam Canones irritam definiunt, nos quoque euacuandam esse cen-
suimus, in qua prætermissa trium præsentia, nec expetitis comprouincia-
lium literis, Metropolitani quoque voluntate neglecta, prorsus nihil quod
Episcopum faceret ostensum est.] Postea tamen Metropolitæ dignitatem
authoritatemque obtinuit, vt ex epistola Hilari Papæ ad Leontium, Ve-
ranum, & Victurum discitur: [Frater, inquit, & Coepiscopus noster In-
genus Ebredunensis, Alpium Maritimarum Prouinciæ Metropolitani
semper honore subnixus, in præiudicium suum, sicut adnexa declarant,
quædam nos, petente fratre & Coepiscopo nostro Auxanio, statuisse com-
memorat, quæ vniuersis in hac eadem causa defensionibus contrairent.]
Nec omittendum arbitror, quod in fine huius Epistolæ, Cemelenensis & Ni-
caënsis Episcopatus sub eiusdē Ingeni authoritate, ab ipsomet Hilario hæc
scribente vniuntur.] Habeat itaque Pontificiū frater & Coepiscopus noster
Ingenus Prouinciæ suæ, de cuius dudum ab Apostolica sede est illicita ces-
sione culpatus: & custoditis omnibus, quæ super Ecclesijs Cemelenensis
Ciuitatis, vel Castelli Nicaënsis, sicut diximus, sanctæ memoriæ decessoris
mei definiuit auctoritas, nihil Ecclesiarum iuri noceat, quod in altera me-
moratarū à prædicto fratre, ad excludendam cupiditatem, quemadmodum
perhibuit, ambitionis alienæ, proximè est Episcopus consecratus: sed sta-
tutæ correctionis forma permaneat, vt ad vnius Antistitis regimen prædi-
cta loca reuertantur, quæ in duos diuidi non decuit Sacerdotes. Deus vos
incolumes custodiat fratres carissimi.

a Hilarius P. epist.
4. ad Leontium &c.

NOTITIA ANTIQVA EPISCOPATVVM GALLIÆ.

ARELATENSIS PROVINCIA, QVÆ ET VIENNENSIS II.

ARELATVM Colonia Ptol. lib. 2. cap. 10. vulgò *Arles*. *Trophimus*
huius primus Episcopus dicitur apud Gregorium Turon. lib. 1. histor.
Franc. cap. 30. & *Marinus* subscripsit Concilio Arelatensi primo.

MASSILIA Ptol. ibid. vulgò *Marseilles*. *Oresius* huius Episcopus sub-
scripsit Concilio Arelatensi primo, & *Proculi* Massiliensis Episcopi mentio
fit Canone primo Concilij Taurinensis.

AVENIO, Auenniorum colonia Ptol. ibid. vulgò *Auignon*. *Iulianus* hu-
ius Episcopus per Pompeium Presbyterum subscripsit Concilio Agathensi,
& *Salutaris* Epaonensi.

CABELLIO, Cabelliorum colonia Ptol. ibid. vulgò *Cavaillon*. *Phila-
grius* huius Episc. subscripsit Concilio Epaonensi, & *Prætextatus* Aurel. V.

CARPENTORACTE Plin. lib. 3. cap. 4. Ciuitas Episcopalis, apud quam
Concilium celebratum est sub Felice Papa quarto, vulgò *Carpentras*. Ex eius
Episcopis *Iulianus* subscripsit Concilio Epaonensi, & *Clematius* Aurel. IV.